

COMUNICATO n. 865 del 19/04/2024

Traduzione in mòcheno

Zivil dinst, paroatet 75 naia projektn ver 124 junga

[Mòcheno] S vonk u' de zboate va de viar projektn as mein kemmen tscherlt bail en jor ver en universalet provizalet Zivil dinst. S meing se u'melln ont kemmen tscherlt ver oa'n van 75 projektn as offet sai', de junga as hom van 18 finz as de 29 jor nèt gamòcht, ver 124 platz vourstellt. De rifzait ist ònderst ver an iatn projekt ober men bart nèt gea' iber de 3 van moi as kimp, derbail s u'vong ver òlla de projektn ist en somsta earste van prochet.

Ver de vicepresidenten va de Provinz ont assossor en de lear, kultur ont sport, politiker ver de familie, ver de jungen ont ver de ebegen meglechkaitn, toalnemmen en Zivil dinst bill song leing se ont proviarn rècht bos as billt song en konkret ont operativ, aukriang s bissn va de bèlt va de òrbet, bocksn abia lait ont kemmen rèchta òllgamoalait. De vicepresidentet innlont za schau as de sait internet as klòfft van projektn ver za vinnen zbischn de vil vourtschbinnen de sèll as mearer past ver sèlber no sèll as men guat sait za tea': s provinzal zivil dinst vourstellt ver de junga a meglechkait ver za drinngae' en de bèlt va de òrbet en projektn drautschaukt va de provinzaln omtn as pakimmern se as de boregen vourtschbinnen va de opfern va de òllòndra organizzazioni. En de glaiche zait SCUP gip de meglechkait en de junga za kennen naia sektorn va interess ont kennen sèll as men sait guat za tea' zan pestn ont sèll as pfòllt. Ver dòs de vicepresidenten tuat ailm en de junga ver za nemmen toal en de doi meglechkait.

De sitzn van projektn sai' umanònder en de eirter va de Porvinz. De mearestn projektn SCUP sai' ka Trea't (39) ont en Vallagarina (21), ober s kemmender vourtschbinnt gor ka Ala, en Burng, ka Cles, ka Persn, ont en de Piana Rotaliana, en Valle dei laghi ont en òndra derver va de Provinz. S hòt 67 projektn va zbelf mu'netn, 5 projektn va secksn mu'netn, 3 projektn va drai mu'netn.

Vil de sektorn òrbetn: umbèlt, hilf, komunikazion ont технологи, kultur, ziglkait ont schual, sport ont turismus. Ver an iatn projekt asn sito hòt s a sait pet de datn, de dokumentn van gònz projekt ont de sait as leuk zòmm de bichtestn elementn va de vourtschbinn. Men tuat innlònen za u'riaven de oraganisasionen as trong envire an iatn projekt, as leing semm a mentsch ver za gem òlla de nochrìchtn. De stunnen va òrbet sai' 30 as de bòch, ver za verdea'n 600 euro as mu'net. Men kònnnt toalnemmen lai en an projekt.

Der omt van zivil dinst va de Provinz vourstellt a toal informativ trèffn ver ber as enteressiart ist. An iatn trèff gip nochrìchtn ver za tschern en zan pestn der projekt as past ont ver za mòchen der vrogrèff ver za kemmen ganòmmen. Men bart klòffen va bos as ist der zivil dinst, abia as ist gamòcht an projekt, abia as men lest en, abia za tschern en, bos as kimm pfrok ver za toalnemmen ont vil ònderst. De trèffn sai' òlla online: ver za vinnen de beirter schlissln ver za drinngae' ist ganua schaug as de sait SCUP.

De ta ont de stunnen van trèffen sai' de doin:

ma'ta as de 15 van oberel, um 14.00

pfinsta as de 18 van oberel, um 21.00

eirta as de 23 van oberel, um 11.00

Ver za pavrong se ver en Zivil dinst, oder ver de minderstn rèchtn ver za toalnemmen ont ver za kemmen gaholven ver za innschraim se ist moglech vrong en Omt van Zivil dinst va de Provinz en via Grazioli, 1 ka Trea't;

mail: uff.serviziocivile@provincia.tn.it; tel. 0461 493 100.

Nochrichtn asn zivil dinst: <http://www.serviziocivile.provincia.tn.it/>

Ver za bissn abia za schraim se inn en SCUP: <https://serviziocivile.provincia.tn.it/Adesione%23iscriviti>

Ver za schaug de projektn gadrukt:

[https://serviziocivile.provincia.tn.it/Progetti/\(filter\)/Progetti%2520SCUP_PAT](https://serviziocivile.provincia.tn.it/Progetti/(filter)/Progetti%2520SCUP_PAT)

S ist dèster schaug aa as de sait va Facebook "WeSCUP il servizio civile trentino" ont as de sait Instagram #SCUP Trento.

Ibersetz gamòcht van Sprochtirl va de Tolgamoas'schèft Hoa Valzegu' ont Bersntol

(cdt)